

## Održan hitan sastanak Koordinacionog tima KS za migrante s načelnikom Hadžića



Na hitnom sastanku Koordinacionog tima Kantona Sarajevo za migrante s načelnikom općine Hadžići i drugim akterima, održanom povodom migrantske krize i tereta koji najviše trpi ova općina, sa sigurnosnog aspekta je izražena potreba za postojanjem još jednog objekta gdje bi policija mogla smjestiti migrante i izbjeglice.

Procesuiranje migranata i izbjeglica je otežano zbog neposjedovanja dokumenata pa je neophodno napraviti dodatnu saradnju sa tužilaštvima, zaključeno je također na sastanku.

Sa zdravstvenog aspekta je iskazana potreba za institucionalnim nadzorom higijensko-epidemiološkog stanja u prihvatnom centru Ušivak. U slučaju eskalacije broja migranata, došlo bi do većih potreba za hranom te je potrebno izvršiti evidenciju robnih rezervi Kantona Sarajevo.

Centar za socijalni rad Hadžići je iskazao potrebu za još jednim pravnikom koji bi bio angažovan na poslovima brige o djeci bez roditeljskog staranja i pratnje. U vezi s rješavanjem javnog gradskog prijevoza, treba pojačati autobuske linije koje povezuju općinu Hadžići sa centrom grada, zaključeno je također.

Hitni sastanak Koordinacionog tima Kantona Sarajevo za migrante s načelnikom općine Hadžići, predstavnicima Službe za poslove sa strancima i predstavnicima Međunarodne organizacije za migrante (IOM) BiH održan je jučer popodne u Hadžićima. Jedina tačka dnevnog reda bio je uvećan priliv migranata, s fokusom na tu općinu.

Nakon što su posjetili migracioni centar Ušivak, sastanku su prisustvovali načelnik Hamdo Ejubović, premijer Kantona Sarajevo Edin Forto, direktor Službe za poslove sa strancima Slobodan Ujić, ministri u Vladi Kantona Sarajevo Malik Garibija, Amela Softić i Admir Katica, komesar policije KS Milorad Bašić, načelnik Policijske stanice Hadžići Asim Merdanović te predstavnici Kantonalnog zavoda za javno zdravstvo, robnih rezervi KS, Javne ustanove „Centar za socijalni rad“, Kantonalne uprave Civilne zaštite, predstavnici Međunarodne organizacije za migracije (IOM) BiH.

“Sve ono što Kanton Sarajevo može uraditi da pomogne općini Hadžići koja trpi ubjedljivo najveći pritisak,

uradit ćemo. Iz tog razloga je organizovan ovaj sastanak. Prije svega, načelniku općine Hadžići i svim stanovnicima želim da se posebno zahvalim zato što ovom problemu pristupaju na izuzetno human način iako zbog prirode krize trpe najviše posljedica”, rekao je ministar Malik Garibija.

“Ovo je kazna za nas. Što je najgore, mi ne znamo do kada će ova kazna trajati niti ima bilo ko da nama Hadžićanima kaže do kada ćemo ovo trpiti. Želim s ovog nivoa poručiti da je naše strpljenje na samoj granici. Migranti polako remete naš normalan život. Ako oni imaju svoja prava, imamo i mi, lokalno stanovništvo, da u mjestu gdje smo se rodili, slobodno, bezbjedno i normalno živimo. Od ovog tima očekujem da zajedno s nama izvrši pritisak na Vladu FBiH i na Vijeće ministara BiH da rastereti Ušivak i nas Hadžićane na način da se oformi nekoliko drugih centara izvan naše općine kako bi se teret migrantske krize ravnomjerno rasporedio”, poručio je Ejubović.

Kantonalni premijer Edin Forto rekao je da će kantonalne vlasti posebnu pažnju posvetiti općini Hadžići i učiniti sve da ublaže ovu situaciju. Međutim, to neće riješiti problem migrantske krize.

“Potpuno se slažem s načelnikom Ejubovićem da, kada bi se donijela odluka na nivou Vijeća ministara BiH i izdala jasna komanda o gradnji prihvatnih centara na drugim lokacijama izvan Kantona Sarajevo, da bi situacija bila puno drugačija”, smatra Forto.

Direktor Službe za poslove sa strancima i član državnog tima za rješavanje migrantske krize Slobodan Ujić je rekao da niko nema čarobni štapić za rješavanje ove krize koja će potrajati duže.

“Trenutno u Turskoj imamo između tri i četiri miliona izbjeglica, a u Grčkoj između 70.000 i 80.000 migranata. Dva su pravca njihovog kretanja, iz Grčke preko BiH, za zemlje zapadne Evrope, i druga ruta je preko Srbije koja čini oko 80 odsto ilegalnog ulaska migranata u našu zemlju i negdje oko 20 odsto ulazaka iz pravca Crne Gore. Ja nisam za to da BiH postane sabirni centar. Državne granice su naš najveći problem. Ako to ne riješimo, onda nema pomaka ni na lokalnom nivou. S današnjim danom mi imamo nešto preko 14.000 registrovanih migranata. Nas taj problem sigurno čeka u narednih nekoliko godina. Što se tiče konkretno Hadžića, apsolutno podržavam ideju načelnika Ejubovića da se oformi nekoliko drugih lokacija za prihvat migranata kako bi se situacija u Kantonu Sarajevo relaksirala”, Ujićeve su riječi.

Date: 01-08-2019